



Tutmonda Biblioteko je la
memoro de L. Tolstoj.

..... № 5

DIO VIDAS VERON, SED NE BALDAU DIROS.

RAKONTO DE
L. TOLSTOJ.

Tradukis el rusa lingvo

N. Kabanov.

ELDONO № 1033 DE LA FIRMO
„POSREDNIK“ (PERANTO).

Богъ правду видить, да не скоро скажетъ. Льва Толстого.
ВЪ ПЕРЕВОДЪ НА ЭСПЕРАНТО.

Издание „ПОСРЕДНИКА“.

Tiu ĉi esperanta serio estas redaktata de d-ro N. Kabanov.

Moskvo. 1912.

POR KIO ESTAS ELDONATA „TUTMONDA BIBLIOTEKO JE
LA MEMORO DE L. TOLSTOJ“.

„Unu animo en ĉiuj“—vere diras L. Tolstoj. Tial ĉefa tasko de homa vivo estas ĉiam pli granda frata unuiĝo de homoj, de gentoj kaj de popoloj kaj, plue, unuiĝo de ĉio vivanta sur la tero.

Nia eldona firmo „Posrednik“ (Peranto), kiu estas fondita de L. Tolstoj en 1885 jaro, kaj kiu nun estas esperantia entrepreno, starigis kiel sian taskon eldonadon de libroj, disvastigantaj ideojn de la frata unuiĝo de homoj kaj de ĉio vivanta en mondo. Pro tio, ke la internacia lingvo Esperanto estas kreita nome por tia celo de la unuiĝo de homoj de ĉiuj gentoj kaj popoloj, nia eldona firmo nun komencas eldonadon de libroj en lingvo Esperanto.

Plej alta, plej ĝojiga unuiĝo de homoj estas unuiĝo en komunaj sentoj de frateco, de amo, de heroa kaj modesta ĉiutaga sindonemo, de kompatemo rilate al ĉiuj vivaj estaĵoj, de frata kunhelpado kaj kunlaborado de homoj por komuna bono. Pro tio libroj de esperanta fako de nia eldona firmo estos celantaj ĉefe disvastigadon de tiuj ĉi sentoj, de tiuj ĉi ideoj.

Serio de niaj esperantaj eldonaĵoj estas nomata „Tutmonda Biblioteko“ kaj estas dediĉita al la memoro de nia amiko Lev Nikolaeviĉ Tolstoj, granda predikanto de la unuiĝo de ĉiuj vivoj en mondo.

Komencante tiun ĉi aferon, ni forte esperas subtenadon de ĉiuj, kunsentantaj al la afero. Tiu ĉi subtenado povas esprimiĝi en komunikadoj al ni de verkoj kaj de artikoloj, presitaj en iaj ajn lingvoj kaj plej konformantaj al la fundamentaj ideoj de „Tutmonda Biblioteko“, kaj en helpado de kiel eble plej vasta disvastigado de libretoj de „Tutmonda Biblioteko“ en ĉiuj landoj, kie estas uzata la lingvo Esperanto.

Amikoj en ĉiuj landoj! akceptu saluton de nia frata amo. Ni laboru amike kune por komuna sankta al ni celo.

Ĉefa redaktoro-eldonanto de firmo „Posrednik“

I. G o r b u n o v - P o s a d o v .

Moskvo, Arbat, 36.

Tutmonda Biblioteko je la memoro
de L. Tolstoj.

№ 5.

DIO VIDAS VERON,
SED NE BALDAŬ DIROS.

RAKONTO DE

L. Tolstoj.

*Tradukis el rusa lingvo
N. Kabanov.*



ELDONO DE LA FIRMO

„POSREDNIK“ (PERANTO).

№ 1033.

Moskvo, 1912.

Tiu ĉi esperanta serio estas redaktata de d-ro N. Kabanov.



Типо-литогр. Т-ва И. Н. Кушнеревъ и К^о. Пименовская ул., соб. д.

Москва—1912.

DIO VIDAS VERON, SED NE
BALDAU DIROS.

En urbo Vladimir vivis unu juna komercisto Aksjonov. Li havis du magazenojn kaj domon.

Aksjonov havis blondajn krispajn harojn, estis bela kaj estis granda gajulo kaj kantulo. En juna aĝo Aksjonov multe drinkis kaj, kiam li estis ebria, estis tre mal-kvieta; sed de tiu tempo, kiam li edziĝis, li ĉesis drinki, kaj nur malofte ĝi okazis al li.

Unu fojon, somere, Aksjonov ekveturis Nijnij'n Nòvgorod'on por foiro. Kiam li komencis adiaŭi kun la familio, la edzino diris al li:

— Ivàn Dmitrievič, ne ekveturu vi hodiaŭ, mi malbone sonĝis pri vi.

Aksjonov ekridis kaj diris:

— Vi ĉiam timas, ke mi diboĉos en la foiro?

La edzino diris:

— Mi ne scias mem, kion mi timas, sed mi sonĝis malbone: mi sonĝis, kvazaŭ vi venas el la urbo, demetis ĉapon, kaj mi vidas: via kapo estas tuta griza.

Aksjonov ekridis.

— Nu, ĝi signifas profiton. Jen mi bone komercos kaj alveturigos al vi karajn donacojn.

Kaj li adiaŭis kun la familio kaj forveturis.

Je duono de vojo li kunveturis kun konata komercisto kaj haltis kune kun li por pasigi nokton. Ili trinkis teon kaj kuŝiĝis dormi en apudaj ĉambroj. Aksjonov ne ŝatis longe dormi; li maldormiĝis meze de la nokto kaj, por ke estu pli malvarmete veturi, li maldormigis veturigiston kaj ordonis jungi ĉevalojn. Poste li ekiris al mastro, pagis al li kaj forveturis.

Deveturinte kvardek verstojn, li haltis por nutri ĉevalojn, iom dormis en vestiblo de halte a domo kaj je tempo de tagmanĝo eliris sur peronon, ordonis pretigi samovaron, elmetis gitaron kaj komencis ludi. Subite triĉevala veturilo kun sonorileto alveturas al la domo, kaj regna oficisto kun du soldatoj malsupreniĝas de la veturilo, aliras al Aksjonov kaj demandas: kiu? de kie? Aksjonov rakontas ĉion, kiel estas, kaj petas: bonvolu trinki teon kun mi! Tamen la oficisto ĉiam daŭrigas eldemandi: kie li pasigis pasintan nokton? Sola aŭ kun komercisto? Ĉu li vidis komerciston matene? Por kio li forveturis tiel frumatene? Aksjonov ekmiris, pro kio oni demandas lin pri ĉio, rakontis ĉion, kiel estis, kaj diras:

— Pro kio vi eldemandadas min tiel, mi estas nek ŝtelisto, nek rabisto. Mi veturas por mia afero, kaj malnecesas al vi demandi min.

Tiam la oficisto vokis la soldatojn kaj diris:

— Mi estas distrikta poliestro kaj mi demandas vin pro tio, ke la komercisto, kun kiu vi pasigis antaŭan nokton, estas mortigita per tranĉilo. Montru vian havaĵon; he vi traseru lin.

Oni eniris domon, prenis valizon kaj sakon kaj komencis traserĉi. Subite la poliestro elmetis el la sako tranĉilon kaj ekkriis:

— Kies tranĉilo ĝi estas?

Aksjonov ekrigardis, vidas—oni elmetis el lia sako la sangokovritan tranĉilon, kaj ektimis.

— Pro kio sango estas sur la tranĉilo?

Aksjonov volis respondi, sed povis elparoli nenian vorton.

— Mi... mi ne scias... mi... tranĉilo... mi... ne mia...

Tiam la poliestro diris:

— Matene oni trovis sur la lito la komerciston mortigita per tranĉilo, kaj krom vi neniu estis, kiu povus fari ĉi tion. La domo estas fermita de interne, kaj en domo neniu estis krom vi. Jen ankaŭ oni trovis la sangokovritan tranĉilon en via sako, kaj laŭ via vizaĝo estas vidate. Diru, kiel vi mortigis lin kaj kiom da mono vi ŝtelis.

Aksjonov ĵuris, ke ne li faris ĉi tion, ke li ne vidis la komerciston post tio, kiam li trinkis teon kun li, ke li havas sian propran monon, ok mil rublojn, ke la tranĉilo ne estas lia. Sed lia voĉo interrompiĝadis, lia vizaĝo estis pala, kaj li tuta tremegis pro timo, kvazaŭ kulpa.

La poliestro vokis soldatojn, ordonis ligi lin kaj konduki al la veturilo. Kiam oni sidigis lin en la veturilon kun ligitaj piedoj, Aksjonov faris krucan signon kaj ekploris. Oni prenis de Aksjonov liajn havaĵon kaj monon, forsendis lin malliberejon. Oni sendis urbon Vladimir'on

sciigi, kia homo estis Aksjonov, kaj ĉiuj komercistoj kaj jurbanoj atestis, ke Aksjonov drinkis kaj diboĉis en juna aĝo, sed li estis bona homo. Tiam oni komencis lin juĝi. Oni juĝis lin pro tio, ke li mortigis la komerciston kaj ŝtelis dudek mil rublojn.

La edzino malĝojegis pri la edzo kaj ne sciis, kion opinii. Ŝiaj infanoj estis ankoraŭ malgrandaj, kaj unu estis suĉinfano. Ŝi prenis ĉiujn infanojn kun si kaj ekveturis tiun urbon, kie lia edzo estis en malliberejo. Komence oni ne allasis ŝin, sed poste ŝi elpetis estrojn, kaj oni alkondukis ŝin al la edzo. Kiam ŝi ekvidis lin en mallibereja vesto kaj en katenoj, kune kun rabistoj, ŝi ekfalis teren kaj longe ne povis rekonsciigi. Poste ŝi starigis infanojn ĉirkaŭ si, sidiĝis apud li kaj komencis rakonti al li pri hejmaj aferoj kaj demandi lin pri ĉio, kio okazis al li.

Li rakontis al ŝi ĉion. Ŝi diris:

— Kion fari nun?

Li diris:

— Necesas peti la caron. Ja senkulpulo ne povas perei!

La edzino diris, ke ŝi jam sendis petskribon al la caro, sed la petskribo ne atingis lin. Aksjonov diris neion, nur klinis la kapon. Tiam la edzino diris:

— Ne vane mi tiam songis, kiel vi memoras, ke vi fariĝis griza. Jen vere vi jam griziĝis pro malĝojo. Vi ne devus ekveturi tiam!

Kaj ŝi komencis karesi liajn harojn kaj diris:

— Ivaĉjo, kara amiko, diru al via edzino tutan veron: ĉu vi faris ĉi tion?

Aksjonov diris: „vi ankaŭ opiniis tion ĉi pri mi“,—fermis la vizaĝon per la manoj kaj ekploris. Poste soldato venis kaj diris, ke la edzino kun la infanoj devas foriri. Kaj Aksjonov adiaŭis lastan fojon kun la familio.

Kiam la edzino foriris, Aksjonov komencis rememori, kion ili interparolis. Kiam li ekmemoris, ke lia edzino ankaŭ opiniis pri li kaj demandis lin, ĉu li mortigis la komerciston, li diris al ŝi: „videble, krom Dio neniu povas scii veron kaj necesas nur lin peti kaj nur de li atendi favoron“. Kaj de tiu tempo Aksjonov ĉesis sendi petskribojn, ĉesis esperi kaj nur preĝis al Dio.

Oni aljuĝis puni Aksjonov'on per vipo kaj forsendi por punlaboroj. Tiel oni faris.

Oni vergis lin per vipo kaj poste, kiam vundoj, fari-taj de vipo, resaniĝis, oni sendis lin kun aliaj punlabo-rantoj Siberion.

En Siberio, en punlaborejo, Aksjonov vivis dudek ses jarojn. Liaj haroj sur la kapo fariĝis blankaj, kiel neĝo, kaj barbo elkreskis longa, mallarĝa kaj griza. Tuta lia gajeco malaperis. Li kurbiĝis, komencis iradi malrapide, parolis malmulte, neniam ridis kaj ofte preĝis al Dio.

En malliberejo Aksjonov instruiĝis kudri botojn kaj aĉetis je mono, enspezita per laboro, Evangelion kaj legis ĝin, kiam estis lume en la malliberejo; festojn li vizitis malliberejan preĝejon, legis librojn de Apostoloj kaj kantis en preĝeja ĥoro,—lia voĉo ĉiam ankoraŭ estis bona. Estraro amis Aksjonov'on pro lia modesteco, kaj malliberejaj kamaradoj estimis lin kaj nomis lin „aveto“ kaj „dia homo“. Kiam okaze necesadis peti estraron,—

la kamaradoj ĉiam sendis Aksjonov'on peti la estraron, kaj kiam malpaciĝoj okazadis inter punlaborantoj, ili ĉiam venis al Aksjonov por juĝo.

El hejmo neniu skribis leterojn al Aksjonov, kaj li ne sciis, ĉu liaj edzino kaj infanoj estas vivaj aŭ ne.

Unu fojon oni alveturigis punlaborejon novajn punlaborantojn. Vespere ĉiuj malnovaj punlaborantoj kunvenis ĉirkaŭ novaj kaj komencis demandi ilin, kiu estas el kia urbo aŭ vilaĝo kaj kiu estas punita pro kiaj aferoj. Aksjonov ankaŭ alsidiĝis sur littabuloj al novaj punlaborantoj kaj klininte la kapon aŭskultis, kiu kion rakontis. Unu el novaj punlaborantoj estis altkreska sana maljunulo, sesdekjara, kun griza tondita barbo. Li rakontis, pro kio oni lin arestis. Li diris:

— Jen, fratuloj, mi estas tie ĉi tute pro nenio. Mi formalligis de veturilo ĉevalon de unu veturigisto. Oni ekkaptis min,—diras: mi ŝtelis. Kaj mi diris: mi volis nur ĝisveturi pli baldaŭ,—kaj mi lasis la ĉevalon. Kaj la veturigisto estis mia amiko.—Ne; oni diras, ke mi ŝtelis. Kaj mem ili ne scias, kion kaj kie mi ŝtelis. Okazadis aferoj, mi devus jam antaŭlonge esti ĉi tie, sed oni ne povis evidentigi kulpojn, kaj nun oni alpelis min ĉi tien tute ne laŭleĝe.

— He, vi mensogas, vi estadis en Siberio, sed ne polonge restadis...

— Kaj de kie vi estas? demandis unu el la punlaborantoj.

— Mi estas el urbo Vladimir, tiea burĝo. Kaj mi nomiĝas Makaro Simeðnoviĉ.

Aksjonov levis la kapon kaj demandis:

— Ĉu vi aŭdis ion en urbo pri komercistoj Aksjonov'oj? Ĉu ili estas vivaj?

— Nu, certe, mi aŭdis! Ili estas riĉaj komercistoj, malgraŭ ke ilia patro estas en Siberio. Videble, li estas tia sama, kiel ni, pekuloj. Kaj pro kiaj aferoj vi mem, aveto, estas tie ĉi?

Aksjonov ne amis paroli pri sia malfeliĉo; li ekspiris kaj diris:

— Pro miaj pekoj mi estas en punlaborejo jam dudeksesan jaron.

Makaro Simeonoviĉ diris:

— Pro kiaj pekoj?

Aksjonov diris: „nu, sekve, mi meritis ĉi-tion“, kaj ne volis rakonti plu, sed aliaj malliberejaj kamaradoj rakontis al la nova punlaboranto, pro kio Aksjonov montriĝis en Siberio. Ili rakontis kiel iu mortigis komerciston en vojo kaj enŝovis tranĉilon en sakon de Aksjonov kaj kiel oni kondamnis lin senkulpe.

Kiam Makaro Simeonoviĉ ekaŭdis ĉi tion, li ekrigardis Aksjonov'on, ekfrapis sin per la manoj je la genuoj kaj diris:

— Nu, mirindaĵo! Jen la mirindaĵo! He kiel vi maljuniĝis, aveto!

Oni komencis demandi lin, pro kio li ekmiris kaj kie li vidis Aksjonov'on, sed Makaro Simeonoviĉ ne respondis, nur diris:

— Mirinde estas, bravuloj, kie okazo alkondukis intervidiĝi!

Kaj pro tiuj ĉi vortoj venis en la kapon de Aksjonov, ke tiu ĉi homo eble scias pri tio, kiu mortigis la komerciston. Li diris:

— Ĉu vi, Simeonoviĉ, aŭdis antaŭe pri tiu ĉi afero aŭ ĉu vi vidis min antaŭe?

— Nu certe, mi aŭdis! Sed jam antaŭlonge la afero okazis; kion mi aŭdis, tion mi jam forgesis, diris Makaro Simeonoviĉ.

— Ĉu vi ankaŭ aŭdis, kiu mortigis la komerciston? demandis Aksjonov.

Makaro Simeonoviĉ ekridis kaj diris.

— Certe tiu mortigis, en kies sako la tranĉilo troviĝis. Se iu eĉ enŝovis la tranĉilon en vian sakon, li ne estis kaptita, sekve li ne estas kulpulo. Kaj kiamaniere oni povis enŝovi la tranĉilon en la sakon? Ja la sako estis sub via kapo? Certe vi sentus ĉi tion.

Apenaŭ Aksjonov aŭdis tiujn ĉi vortojn, li ekopiniis, ke tiu ĉi sama homo mortigis la komerciston. Li sin levis kaj deiris for. Tutan tiun ĉi nokton Aksjonov ne povis dormi; li ekenuis, kaj revoj ĉirkaŭprenis lin: jen revigaĵo al li lia edzino—tia, kia ŝi estis, kiam li estis forveturanta laston fojon por foiro. Kvazaŭ li vidis ŝin, kiel vivan, vidis ŝian vizaĝon kaj okulojn, aŭdis kiel ŝi parolis al li kaj ridis. Poste revigaĵo al li la infanoj—tiaj, kiaj ili estis tiam—malgrandetaj, unu en pelteto, alia—apud mamoj. Kaj li rememoris sin, kia li estis tiam—gaja, juna; li ekmemoris, kiel li sidis sur la pèrono de la halteja domo, kie oni arestis lin, kaj ludis je gitaro, kiel estis gaje al li tiam en la animo. Kaj li

rememoris punlokon, kie oni vergis lin, kaj puniston kaj popolon ĉirkaŭe, kaj katenojn, kaj punlaborantojn kaj tutan sian dudeksesjaran malliberejan vivon, kaj rememoris sian maljunecon. Kaj tia enuo atakis lin, ke eĉ venis pensoj pri memmortigo.

— Kaj ĉio fariĝis de tiu malbonulo!.. pensis Aksjonov.

Kaj tia kolerego ĉirkaŭprenis lin, ke li estis preta mem pereji, nur por venĝi al li. Li preĝis tutan nokton, sed li ne povis trankviliĝi. Dum tago li ne aliris al Makaro Simeĉnoviĉ kaj ne rigardis lin.

Tiel pasis du semajnoj. Noktojn Aksjonov ne povis dormi, kaj tia malĝojo atakis lin, ke li ne sciis, kien rifuĝi.

Unu fojon, nokte li iradis en la malliberejo kaj ekvidis, ke tero ŝutiĝas el sub unu tabula lito. Li haltis por rigardi. Subite Makaro Simeĉnoviĉ elsaltis el-sub la lito kaj kun timigita vizaĝo ekrigardis Aksjonov'on. Aksjonov volis preterpasi por ne vidi lin; sed Makaro ekkaptis lin je mano kaj rakontis, kiel li subfosis trairon sub muroj, kiel li ĉiutage elportas teron en botaj tibiingoj kaj elŝutas sur strato, kiam oni kondukas ilin por laboroj. Li diris:

— Nur silentu, maljunulo; mi elkondukos ankaŭ vin. Sed se vi diros, oni vergos min, sed mi ne pardonos tion ĉi al vi—mi mortigos vin.

Kiam Aksjonov ekvidis sian malbonulon, li eltiris la manon kaj diris:

— Malnecesas al mi forkuri el la malliberejo; sed mortigi min estas jam malfrue por vi; vi jam antaŭlonge

mortigis min. Kaj ĉu mi diros pri vi, ĉu ne—ĝi estos tial, kiel Dio instruos min.

Alian tagon, kiam oni elkondukis punlaborantojn por laboro, soldatoj rimarkis, ke Makaro Simeĉnoviĉ elŝutis teron; oni komencis traserĉi en la malliberejo kaj trovis truon. Estro alveturis malliberejon kaj komencis demandi ĉiujn, kiu elfosis truon. Ĉiuj neis. Tiuj, kiuj sciis, ne perfidis Makaron Simeĉnoviĉ'on, ĉar ili sciis, ke pro tia afero oni vergos lin ĝis duonmorto. Tiam 'la estro sin turnis al Aksjonov. Li sciis, ke Aksjonov estas justa homo, kaj diris:

— Maljunulo, vi estas verema, diru al mi antaŭ Dio, kiu faris ĉi tion?

Makaro Simeĉnoviĉ staris, kvazaŭ nenio grava okazis, rigardis la estron kaj ne ekrigardadis Aksjonov'on.

La manoj kaj la lipoj tremis ĉe Aksjonov, kaj li longe ne povis elparoli eĉ unu vorton. Li pensis: se mi diros nenion pri li, pro kio mi indulgos lin? ja li pereigis min. Li suferu pro mia turmentiĝo. Sed se mi denuncos, vere, oni vergos lin ĝis morto. Kaj se mi vane opinias pri li? Kaj ĉu estos al mi pli facile post tio?

La estro diris ankoraŭ unu fojon: „Nu, maljunulo, diru la veron, kiu subfosis?

Aksjonov ekrigardis Makaron Simeĉnoviĉ'on kaj diris:

— Mi ne povas diri, via moŝto. Dio malpermesas al mi diri. Kaj mi ne diros. Kion ajn vi faru kun mi— estas via potenco.

Kiom ajn la estro penis, Aksjonov parolis nenion plu. Tiel oni ne eksciis, kiu subfosis.

Alian nokton, kiam Aksjonov kuŝiĝis sur sian tabulan liton kaj ekdormetis, li ekaŭdis, ke iu aliris kaj sidigis apud liaj piedoj. Li ekrigardis en mallumo kaj ekkonis Makaron. Aksjonov diris:

— Kion vi bezonas ankoraŭ de mi? Kion vi faras ĉi tie?

Makaro Simeònoviĉ silentis. Aksjonov iomete sin levis kaj diris:

— Kio necesas al vi? Foriru! Alie mi vokos soldaton.

Makaro Simeònoviĉ sin klinis tre proksime al Aksjonov kaj murmurete diris:

— Ivano Dmitrieviĉ, pardonu min!

Aksjonov diris:

— Je kio mi pardonos vin?

— Mi mortigis la komerciston, mi enŝovis la tranĉilon en vian sakon. Mi volis mortigi ankaŭ vin, sed oni ekbruis en korto; mi kaŝis la tranĉilon en via sako kaj foriĝis tra fenestro.

Aksjonov silentis kaj ne sciis, kion diri. Makaro Simeònoviĉ malsupreniĝis de la lito, sin klinis ĝis tero kaj diris:

— Ivano Dmitrieviĉ, pardonu min, pardonu pro Dio. Mi konfesos, ke mi mortigis la komerciston, oni pardonos vin. Vi revenos hejmen.

Aksjonov diris:

— Estas facile al vi paroli, sed kiel estas al mi suferi? Kien mi ekiros nun?.. La edzino mortis, la infanoj forgesis min; ne estas, kien mi povus ekiri...

Makaro Simeònoviĉ ne levis sin de tero, batis sin per la kapo je tero kaj parolis:

— Ivano Dmitrievič, pardonu! Kiam oni vergis min per vipo, estis pli facile al mi, ol nun rigardi vin... Kaj vi kompatis min—ne diris pri mi. Pardonu min, pro Kristo! Pardonu min, malbenitan malbonulon!—Kaj li ekploregis.

Kiam Aksjonov ekaŭdis, ke Makaro Simeðnoviĉ ploras, li mem ekploris kaj diris:

— Dio pardonos vin; eble mi estas cent fojojn pli malbona, ol vi!

Kaj li ĉesis enui pri hejmo kaj volis iri nenien el la malliberejo, nur pensis pri lasta horo.

Makaro Simeðnoviĉ ne obeis Aksjonov'on kaj konfesis je sia kulpo. Kiam estis ricevita la permeso al Aksjonov reveni hejmen,—li jam mortis.

МЕЖДУНАРОДНЫЙ ЯЗЫКЪ.

Internacia lingvo.
ВЪ ИЗДАНИИ „ПОСРЕДНИКА“.

- 1) **Н. Кабановъ.** Вспомогательный международный языкъ эсперанто. Съ письмомъ Л. Н. Толстого объ языкъ эсперанто. Цѣна 12 коп.
- N. Kabanov.** Internacia helplingvo Esperanto. Kun letero de L. Tolstoj pri la lingvo Esperanto. Prezo 12 sd.
- 2) **Н. Кабановъ.** Первая эсперантская книга для чтенія съ грамматикой и словаремъ. Второе изданіе. Цѣна 25 коп.
- N. Kabanov.** Unua esperanta legolibro kun gramatiko kaj vortaro. Dua eldono. Prezo 25 sd.
- 3) **Н. Кабановъ.** Полная грамматика эсперантскаго языка. Съ примѣрами, упражненіями и съ переводомъ упражненій на русскій языкъ. Цѣна 40 коп.
- N. Kabanov.** Plena gramatiko de la lingvo Esperanto. Kun ekzemploj, ekzercoj kaj kun rusa traduko de la ekzercoj. Prezo 40 sd.
- 4) **Л. Л. Заменгофъ.** Основы Международнаго языка Эсперанто. Второе изданіе. Цѣна 35 коп.
- L. L. Zamenhof.** La fundamento de la internacia lingvo Esperanto. Dua eldono. Prezo 35 sd.
- 5) **Н. Кабановъ.** Самый легкій языкъ—Эсперанто. Самоучитель эсперантскаго языка для дѣтей, юношества и для всѣхъ, начинающихъ его изучать. Цѣна 35 коп.
- N. Kabanov.** La plej facila lingvo — Esperanto. Memlernolibro de la lingvo Esperanto por infanoj, gejunuloj kaj por ĉiuj komencantaj lerni ĝin. Prezo 35 sd.
- 6) **Н. Кабановъ.** Краткій русско-эсперантскій словарь. Цѣна 40 коп.
- N. Kabanov.** Rusa-esperanta vortaro. Prezo 40 sd.

Продаются въ книжномъ магазинѣ „ПОСРЕДНИКЪ“ (Москва, Петровскія линіи) и въ другихъ книжныхъ магазинахъ. Выписывать можно изъ главн. склада изданій „ПОСРЕДНИКА“: Москва, Арбатъ, д. Тѣстовыхъ, **И. И. Горбунову.**

ВСЕМІРНА БИБЛІОТЕКА ВЪ ПАМ'ЯТЬ Л. Н. ТОЛСТОГО.
TUTMONDA BIBLIOTEKO JE LA MEMORO DE L. TOLSTOJ.

I. Tradukitaj de A. N. Ŝarapov.

- L. Tolstoj. Dio unu por ĉiuj (Surata kafejo) (Богъ одинъ у всѣхъ.)
Prezo 4 k. (5 sd.).
" Unu animo en ĉiuj (Одна душа во всѣхъ.) Prezo 4 k. (5 sd.)
" Unua ŝtupo, aŭ senmortiga nutrado. (Первая ступень.)
Prezo 10 k. (11 sd.).

.....

II. Tradukitaj de N. Kabanov.

- L. Tolstoj. Dio vidas veron, sed ne baldaŭ diros. (Богъ правду видить.)
Prezo 4 k. (5 sd.).
" Du maljunuloj. (Два старика.) Prezo 7 k. (8 sd.).
" Kie estas amo, tie estas Dio. (Гдѣ любовь, тамъ и Богъ.)
Prezo 6 k. (7 sd.)
" Sieĝo de Sebastopolo. (Осада Севастополя.) Prezo 15 k.
(17 sd.).
" Каўказа militkaptito. (Кавказскій плѣнникъ. Prezo 8 k.
(9 sd.).
" Per kio homoj estas vivaj. (Чѣмъ люди живы.) Prezo 7 k.
(8 sd.).

Estas presataj:

Najvin. Pri kio steloj parolas. (О чѣмъ говорятъ звѣзды.)

Garŝin. Kvar tagoj sur kampo de batalo. (Четыре дня на полѣ сраженія.)

" Signalo. (Сигналь.)

" Legendo pri fiero Ageo. (Сказаніе о гордомъ Аггеѣ.)

Semjonov. Kortisto (kun antaŭparolo de L. Tolstoj.) (Дворникъ.)

L. Tolstoj. Unua, dua, tria, kvara kaj kvina libretoj por infanoj.
(Книжки для дѣтей.)

Libroj estas vendataj en la librovendejo „Posrednik“ (Moskvo, Petrovskija linio) kaj en aliaj librovendejoj. Por mendoj vin turni en la ĉefan librotenejon de la eldonoj de „Posrednik“: Moskvo, Arbato, 36, d. Testov, al I. I. Gorbunov.

Выписывать изъ главнаго склада изданій „ПОСРЕДНИКА“: Москва, Арбатъ, д. Тѣстовыхъ, **И. И. Горбунову.**

Цѣна 4 коп.

Pri ĉi tiu libro

La papera eldono:

Tolstoj, Lev. *Dio vidas veron, sed ne baldaŭ diros* / Tradukis el la rusa Nikolaj Kabanov. — Moskvo: Posrednik, 1912. — 16 paĝoj. — (Serio *Tutmonda Biblioteko je la memoro de L. Tolstoj*; N^o5)

La elektronika eldono:

Lev Tolstoj.
Dio vidas veron, sed ne baldaŭ diros.
Kaliningrado: Sezonoj, 2012.
Serio Faksimila; N^o3.

© Sezonoj, 2012.

Skanis kaj prilaboris
Aleksander Korĵenkov

Ĉi tiu senpaga eldonaĵo estas nur por privata legado, ne por pludistribuo.
Oni ne rajtas sen permeso de la editoro (Aleksander Korĵenkov) publikigi ĉi tiun libron plene aŭ fragmente en iu ajn papera kaj elektronika formo.

Elŝutita en la retejo de *Sezonoj*:
<http://esperanto.org/Ondo/Libro/Libro.php>